

SL-NA BASABAR

I.I.D.E.: .

Beartzun (koartela) – Basabar – Arlegi – Munautz – Basabar - Beartzun

Luzeera: 7,630 km

Desnibela: 425 mt

Zailtasuna: ERTAINA

Basabarren Baztango trikuharririk ederrenetarikoak aurkitzen dira. Beartzundik atera eta leporainoko igoera maldatsua egin ondoren, deribazio baten bidez Burgako megalitoak bisitatzeko ahal dira. Inārbegi eta Beartzungo bailarak mugatzen dituen bizkarrean trikuharri haundiak eta ikuspegi ederrak gozatu ondotik, mendi magalean, ohianean eta harrien artean, altxor preziatua zain dugu: Munautzeko trikuharria.

IRTEERA > Beartzun auzoa, Elizondotik 6 km-tara, NA-2596 errepidetik. Hau bukatu eta asfaltu hondatutako bidetik (“Gamioko borda” landa etxeko norabidean) kilometro beteko zigizaga egin, Guardia Zibilaren koartel zaharra (eroria) eta Alka baserrira iritsi arte. Zelai gunea, aparkaleku modura; ez dago ostalaritza zerbitzurik.

OHARRAK

- Arlegiko magaleko bidexka (3,100 km-an) ez da oso argia eta iralekuan galtzen da (100 mt).
- Munautzeko trikuharria magal harritsu batean dago, biderik gabe. Azkeneko tartean kasu haundiz ibili.
- Basabarko lepoan Beartzun PR-NA 3 ibilbidea gurutzatu behar da. Erne seinalizazioarekin.

DESKRIBAPENA

0,000 km: BEARTZUN, Alka baserria (485 mt) eta zelaigune belartsua, aparkaleku modura. Aurrean, kontrabandoa eta Baztango muga kontrolatzeko eraikin zen koartelaren hondakinak. Bidegurutzea: ezkerretik (I.M.>), Maisterrenea baserrira eta Irlintzira (PR-NA 3 Beartzun). Pista nagusitik abiatu (I.E.>), kuartelaren aurretik pasatuz. Ehun metro aurrerago, bi bidegurutze segidan: lehenengoan, zuzen segi, eskuinean bide zelai zementatua utziz; eta 50 mt geroxeago, pista nagusia laburtzen duen bidexkatik zuzen igo.

0,300 km: Pista berriz hartu eta bidegurutzea: ezkerretik, Gamioko borda Landa Etxerako pista. Eskuinetik igo (I.E.>), zementozko bide maldatsutik; metro batzutara erreka eta aska zeharkatu.

0,730 km: Xondonea baserria (555 mt), mendi magalean. Iritsi baino lehen, bidegurutzea: baserriko bidea utzi eta ezkerrean jo (I.E.>), haritz zaharretan barna eta malda gora pikuan.

1,435 km: BASABARKO LEPOA (688 mt), Beartzundik Inārbegirako pistak zeharkatua. Bide balizatuen elkargunea: pistatik ezkerrean (M.>), Beartzun eta Irlintzira (PR-NA 3 ibilbidea); eskuinetik (H.E.>), Basabarko borda eta Berderitzko bidea (PR-NA 3); eskuin aldetik ere (E.>), mendi bizkarretik igotzen den bidea (SL-aren norabide nagusia). Ezkerrean jo (I.M.>), Burgako megalitoetara doan deribazioa: pista bat itxitura baten ondotik; 50 mt-ra, pista utzi eta ezkerreko bidetik igo, mendi bizkarra segituz, ote eta mendi larretan barna.

1,570 km: Bidearen ondoan, argi postea. Ezkerretik 30 mt-ra Basabarko zutarri etzana dago (IKUS: 279 fitxa), harrobitik atera gabe. Bidera itzuli eta bizkarretik igo.

1,835 km: Burgako trikuharria (750 mt), bidearen ezkerrean (IKUS: 280 fitxa). Etortzeko bidetik Basabarrera itzuli.

2,265 km: BASABARKO LEPOA (688 mt). Pista nagusia zeharkatu eta zuzen segi (E.>), mendi bizkarrean gora; eskuinean, Berderitz lepoko bide zelaia (PR-NA 3) eta Basabarko borda geratzen dira. Bidea traktore markakin, pagadia beti ezkerrean utziz.

2,570 km: Malda bukatu (725 mt) eta Lamizilo trikuharria (IKUS: 270 fitxa). Larrametseko bizkar honetan 2 trikuharrik, 4 tumuluk eta harrespil batek osaturiko gune megalitikoa aurkitzen da: mendi bizkarra zuzen segitu edo pagadiaren mugatik doan bidetik jo, tarteka eskuinera desbideratuz; 75 mt aurrerago Lamiziloko tumuluak (IKUS: 271 eta 272-274 fitxak) daude.

2,785 km: Lepoa eta pagadia. Bidearen ezkerrean, Errolan-eko harrespila (IKUS: 276 fitxa) eta 10 mt aurrerago eskuinean, Errolan-eko trikuharria (IKUS: 275 fitxa). Pagadian barna segitu.

2,900 km: Burdimixko lepoa (725 mt). Bide nagusiak eskuinera utzi eta mendi bizkarreko bidexkatik zuzen igo (E.>), hasieran pagaditik eta gero iralekuan barna (Erne: udan bidexka iralekuan galtzen da 100 mt-an; bizkarra mantendu).

3,195 km: Lehengo bidearekin konfluentzia, iralekuan eta elorri zuri baten ondoan. Ezkerretik igo (E.>), Arlegiko bizkar zabal eta belartsuan barna; metro gutxi barru, tarte zelaia eta malda behera apala hasten da. Ezkerrean Errolanen Harriak geratzen dira.

3,620 km: Lepoa (795 mt) eta harresi eroria, eskuinean; 80 metro aurrerago, ibilbidearen ardatza izan den bizkarra utzi eta ezkerreko magaletik jeitsi, pagadian barnako bidexkatik. Malda behera lasaia, egur ikatza egiteko plazak gurutzatuz.

4,050 km: Munauzko erreka (775 mt) eta ubide hondatua, garai batean minerala ateratzekoa. Biak zeharkatu eta 60 mt-ako tarte zelaia egin, bide argirik ez eta harri lasoen gainetik; ohianeko zabalguneko batera iritsi eta eskuinetik igo (H.E.>) harlauzen artean.

4,200 km: MUNAUZKO TRIKUHARRIA (830 mt), mendi magalean (IKUS: 265 fitxa), harriz inguraturik eta pagadiaren erdian. Itzulia bide beretik, Basabarko lepoan barna (Erne: Arlegitik Burdimixko leporako jeitsieran -5,175 km- bide nagusia utzi eta eskuineko iralekutik jeitsi).

6,195 km: BASABARKO LEPOA (688 mt). Ezkerrean jo (M.>) hariztian barna. Jeitsiera zuzena ezkerreko harresiaren ondotik eta eskuinean Beartzungo pista utzita. Xondonea baserretik, bide zabala eta zementatua.

7,630 km: BEARTZUN (485 mt), koartela eta Alka baserria; aparkaleku moduko zelaigunea. Ibilbidearen hasiera eta bukaera.